

Međunarodni dan sjećanja i komemoracije genocida u Srebrenici 1995. godine

Generalna skupština,

PP1 Vodeći se Poveljom Ujedinjenih nacija, Univerzalnom deklaracijom o ljudskim pravima i Konvencijom o spriječavanju i kažnjavanju zločina genocida,

PP2 Podsjećajući na odgovornost država da štite civile i poštuju, štite i osiguraju ljudska prava za sve na svojoj teritoriji i pod svojom jurisdikcijom, kako je predviđeno međunarodnim pravom, i dalje potvrđujući odgovornost svake države da štiti svoje stanovništvo od genocida, ratnih zločina, etničkog čišćenja i zločina protiv čovječnosti,

PP3 Podsjećajući na Rezoluciju Savjeta bezbjednosti 819 od 16. aprila 1993. godine kojom je Srebrenica proglašena sigurnom zonom, Rezoluciju 827 od 25. maja 1993. godine o osnivanju Međunarodnog krivičnog suda za bivšu Jugoslaviju (MKSJ), i Rezoluciju 1966 od 22. decembra 2010. godine o osnivanju Međunarodnog rezidualnog mehanizma za krivične sudove (Mehanizam),

PP4 Podsjećajući dalje na sve presude MKSJ-a, a posebno osam osuđujućih krivičnih presuda za zločin genocida počinjen u Srebrenici 1995. godine protiv bosanskih muslimana, posebno na odluku Apelacionog vijeća MKSJ od 19. aprila 2004. godine (Tužilac protiv Krstića), odluku Apelacionog vijeća Mehanizma od 8. juna 2021. godine (Tužilac protiv Mladića), odluku Apelacionog vijeća Mehanizma od 20. marta 2019. godine (Tužilac protiv Karadžića), kao i odluku Međunarodnog suda (ICJ) od 26. februara 2007. godine kojom je utvrđeno da su počinjena u Srebrenici akti genocida,

PP5 Ponovno potvrđujući svoj snažan stav protiv nekažnjivosti za genocid, zločine protiv čovječnosti, ratne zločine ili druge povrede međunarodnog humanitarnog prava i međunarodnog prava ljudskih prava, i naglašava u tom kontekstu odgovornost država da okončaju nekažnjivost i, u tu svrhu, temeljno istraže i procesuiraju, u skladu sa svojim relevantnim međunarodnim pravnim obavezama i domaćim zakonodavstvom, osobe odgovorne za takve akte, kako bi se izbjeglo njihovo ponavljanje i težilo održivom miru, pravdi, istini i pomirenju, u kojem je ključno učešće žrtava i preživjelih, kao i njihovih članova porodica,

PP6 Pozdravljajući važan napredak koji su međunarodni sudovi ostvarili poslednjih godina u borbi protiv nekažnjivosti i osiguranju odgovornosti za genocid, zločine protiv čovječnosti, ratne zločine i druge ozbiljne zločine putem međunarodnog krivičnog pravosuđa,

PP7 Prepoznajući u tom smislu poseban doprinos MKSJ i naglašavajući važnost spremnosti međunarodne zajednice da preduzme kolektivne akcije putem Savjeta bezbjednosti, u skladu sa Poveljom, kako bi u svakom pojedinačnom slučaju osigurala odgovornost i spriječavanje genocida.

PP8 Uzimajući u obzir ulogu posebnih savjetnika Generalnog sekretara o spriječavanju genocida i odgovornosti za zaštitu; i napominjući značaj redovnog izvještavanja o povredama ljudskih prava i međunarodnog humanitarnog prava, kao i o govoru mržnje i podsticanju blagovremenog podizanja svijesti o mogućem genocidu,

PP9 Takođe napominjući da procesuiranje osoba odgovornih za genocid i druge međunarodne zločine u okviru nacionalnih pravosudnih sistema, uključujući Sud Bosne i Hercegovine, MKSJ kao i Mehanizam, ostaje od ključnog značaja za proces nacionalnog pomirenja i izgradnje povjerenja i za obnovu i održavanje mira u Bosni i Hercegovini, i dalje prepoznajući da je snažna regionalna saradnja između nacionalnih tužilačkih kancelarija esencijalna za promociju mira, pravde, istine i pomirenja među zemljama u regionu,

PP10 Napominjući da će 2025. godine biti obilježena trideseta godišnjica genocida u Srebrenici, u kojem je izgubljeno najmanje 8.372 života, hiljade su raseljene, a porodice i zajednice devastirane,

1. Odlučuje da proglasi 11. jul za Međunarodni dan sjećanja i komemoracije genocida u Srebrenici 1995. godine koji će se obilježavati svake godine;

2. Osuđuje bez ikakve rezerve bilo kakvo negiranje genocida u Srebrenici i poziva države članice da sačuvaju utvrđene činjenice, uključujući kroz svoje obrazovne sisteme tako što će razviti odgovarajuće programe, takođe u cilju sjećanja, kako bi se spriječili revizionizam i ponavljanja genocida u budućnosti;

3. Takođe bezrezervno osuđuje radnje kojima se veličaju osuđeni za ratne zločine, zločine protiv čovječnosti i genocid, uključujući one odgovorne za genocid u Srebrenici;

4. Naglašava važnost okončanja procesa pronalaženja i identifikacije preostalih žrtava genocida u Srebrenici i pružanja dostojanstvenog sahranjivanja, i poziva na kontinuirano procesuiranje počinitelaca genocida u Srebrenici;

5. Podstiče sve države da u potpunosti poštuju svoje obaveze prema Konvenciji o spriječavanju i kažnjavanju zločina genocida, kada je to primjenjivo, i običajnom međunarodnom pravu o spriječavanju i kažnjavanju genocida uz odgovarajuće poštovanje relevantnih odluka Međunarodnog suda pravde;

6. Zahtjeva od Generalnog sekretara da uspostavi program informisanja pod nazivom "Genocid u Srebrenici i Ujedinjene nacije", i započne sa aktivnostima za pripremu tridesetogodišnjice 2025. godine, nadalje zahtjeva od Generalnog sekretara da uputi ovu rezoluciju svim državama članicama, organizacijama u okviru sistema Ujedinjenih nacija i organizacijama civilnog društva radi odgovarajućeg obilježavanja.

7. Poziva sve države članice, organizacije sistema Ujedinjenih nacija, druge međunarodne i regionalne organizacije, i civilno društvo, uključujući nevladine organizacije, akademske institucije i druge relevantne aktere, da obilježe Međunarodni dan, što uključuje posebna

Zero Draft dated 09 April 2024

obilježavanja i aktivnosti u cilju sjećanja i odavanja počasti žrtvama genocida u Srebrenici 1995. godine, kao i odgovarajuće obrazovanje i druge aktivnosti u cilju podizanja svijesti javnosti.